

تحدي ليه

للكاتب يوسف النصر

المقدمة

تحدي ليه

هي مسابقة قد تبدو بسيطة، تتكون من 100 سؤال مكونة من كلمة واحدة فقط: "ليه؟" المطلوب من المتسابق أن يجيب عن الأسئلة بحد أقصى 10 إجابات داخل موضوع واحد.

إذا نجح المتسابق في جعل مقدم التحدي ينطق بكلام آخر غير "ليه؟"،

يستطيع المتسابق تقليل 10 أسئلة من أصل 100

مع كل كلمة جديدة يتمكن المتسابق من إخراجها من فم مقدم التحدي، يحصل على خصم 10 أسئلة إضافية. ويُشترط أن يكون بين كل خصم وآخر سؤال واحد على الأقل. كما يجب على المتسابق عدم تكرار الإجابة الواحدة أكثر من ثلاث مرات خلال التحدي.

قد تبدو القوانين سهلة، لكن لا يوجد شيء سهل في هذه الحياة. الفائز في التحدي سيحصل على جائزة قيمة، أما الخاسر فلن يتمكن من المشاركة في التحدي مرة أخرى طوال حياته

هذا التحدي قادر على تغيير حياتك، إما للأفضل أو للأسوأ.

فاستعد، لأنك معنا في ذلك التحدي

بدء التحدي

المتسابقة رقم 1

مدير التنظيم: المتسابقة رقم واحد، تفضل بالوقوف هنا. عرفنا بنفسك وابدأ التحدي

المتسابقة أنا رانيا محمد، من القاهرة، عمري 27 سنة

ليه؟

عشان ده اسمي

ليه؟

ما أعرفش

ليه؟

عشان ما سألتش في الموضوع ده قبل كده

ليه؟

عشان مش فاضية

ليه؟

عشان بشتغل

ليه؟

عشان أحقق ذاتي

ليه؟

عشان أعيش حرة

ليه؟

عشان ما أتجوز

ليه؟

علشان معايا فلوس هاعوز الراجل في إيه؟

ليه؟

يعني إيه ليه؟ الكلام ده ما فيهوش ليه؟

ليه؟

أنت إنسان بارد

ليه؟

أنا منسحبة من التحدي

ليه؟

علشان ما بقتش طايقة أسئلتك

ليه؟

زي ما قتلتك، أنت إنسان بارد

ليه؟

خرجوني من هنا أنا منسحبة، مش عايزة أكمل التحدي

مقدم التحدي: نهاية التحدي بي 15 ليه بالتوفيق يا استاذة

مدير التنظيم: اتفضلي يا استاذة، أنت خسرت في التحدي

المتسابقة رقم 2

والآن مع المفاجأة ، المتسابق رقم 2 هو أنت يا عزيزي.

في البداية، اقرأ التحدي وواجبات المتسابقين الأخرى، وبعد ذلك عد إلى تلك الصفحة وأكمل التحدي.

نأمل أن تتمكن من تجاوز هذا التحدي

وعند إتمام التحدي، يجب أن ترسل لنا صور الإجابات في ورقة أو تقوم بطباعة التحدي والإجابة على كل سؤال، ثم ترسل لنا الصور مع الاحتفاظ بنسخة التحدي- الخاصة بك

بعد قراءة المسابقة جيدًا ومعرفة الأخطاء التي يقع بها مقدم التحدي، سوف تعرف كيف تخضع 10 أسئلة من التحدي بكل سهولة.

فأخبرنا كيف أسقطت مقدم التحدي وجعلته يتكلم، وكم إجابة استطعت أن تنتهي به التحدي.

أرسل لنا كل هذا على الصفحة الخاصة بالكاتب يوسف النصر على الرابط التالي أو مسح البرومو كود:

<https://www.facebook.com/Youssef.Al.Nasr.not/>



وإذا استطعت أن تتخطى التحدي، ستكون معنا في الجزء الثاني من التحدي،
وتكون أحد المتسابقين على لقب بطل التحدي ليه؟

دعنا نبدأ

فلفتضل المتسابقة رقم 2

مدير التنظيم: عرفنا بنفسك وسنك وابدأ التحدي

ليه؟

المتسابقة رقم 3

مدير التنظيم: اتفضلي عرفينا بنفسك وسنك وابدئي التحدي

المتسابقة: أمم ازيك

ليه؟

ايه الإحراج ده

ليه؟

علشان انت كده كسفتني

ليه؟

علشان كان المفروض أقول لك ازيك تقول لي ازيك ايه الأخبار عاملة ايه

ليه؟

علشان ده آداب الحوار

ليه؟

علشان انت شكلك شاب شيك

ليه؟

علشان لبسك متهدل وشكله حلو انت اللي بتختار لبسك ده لنفسك

ليه؟

أكيد مش معجبة ببيك بس ذوقك عاجبني

مقدم التحدي: شكرا لك ده من ذوق حضرتك

مدير التنظيم: ايه ده يا أستاذ امسك نفسك مش كده كده معاكي تسعين سؤال يا أستاذة

مقدم التحدي: أنا آسف معلش همسك نفسي المرة الجاية يلا يا أستاذ هنكمل

ليه؟

انت عطرك حلو ممكن تقف

مقدم التحدي: هو السؤال ده لازم أقف فيه ليه بقى

ليه بقى يا أستاذة ايه اللي دخل الطول في ريحة العطر

ليه بقى عايزين نتكلم وبقى عندك ثمانين سؤال بس انا عايز أفهم أقف ليه واياه الي
أدخل وقوفي بريحة العطر فهميني ولا انت داخلة تعصبيني وخلص

المتسابقة: ما تزعليش كده واهدى أنا كنت عايزة أعرف طولك علشان انت مش
باين من المكتب

ليه؟

انت مرتبط

ليه؟

علشان حاسة اننا ممكن نرتبط

ليه؟

علشان شكاك شيك وأنا بحب الرجال الشيك

ليه؟

ما أعرفش بس بحس معاهم بالأمان

ليه؟

انت عينيك دي ولا لانسز

ليه؟

علشان لو مش لانسز يبقى انت كده مز

مقدم التحدي: أف ف ف

المتسابقة: أديك اتكلمت

مقدم التحدي: لا أنا اتنفست بس ما اتكلمتش

المتسابقة: آمال انت بتعمل ايه دلوقت

مدير التنظيم: يا نهار أسود يا أستاذة معاكي سبعين سؤال بس عدى منهم أربعة عشر يا رب ما نتكلمش تاني

المتسابقة: طب أديك انت اتكلمت مش عايز تقول حاجة

مقدم التحدي: أكيد هو انت رقمك كام

المتسابقة: رقمي ده انت قديم قوي

ليه؟

علشان المفروض تسأل عن السناب أو الإنستقرام

ليه؟

علشان ده الجديد انت مش عايش معنا ولا ايه

ليه؟

علشان مش متابع تعرف أنا امبارح منزلة صورة على الإنستقرام

الصورة عدى كنت واقفة أنا ومريم صاحبتني وخالد ابن خالتي بس خالد ده زي أخويا فاهم بس ساعات بيغير عليا لكن أنا استحالة في يوم أفكر فيه ده أخويا

انت فاهم طبعا انت عارف خالد بقى بيقبض كام في الشهر

مقدم التحدي: بيقبض كام

المتسابقة: ننزل عشرة أسئلة كمان

مدير التنظيم: لاه دي باظت خالص ألف مبروك يا أستاذة انت فايضة كده كده معاكي
ستين سؤال

المتسابقة: ده أكيد أمال أنا جاية هنا ليه

ليه؟

علشان أكسب

ليه؟

علشان الجايزه دي كبيرة وهتغير حياتي أنا بفكر أشتري عربية جديدة وكمان اروح
الويك اند باريس وفتح شركة صغيرة لبيع أكل القطط والكلاب ولو بقى معايا فلوس
أنا ممكن أشتري طيارة خاصة لزوم البيزنس وكده

مقدم التحدي: عندك من العدد واحد عربية وواحد أسبوع في باريس وواحد شركة
خاصة وواحد من عدد طيارة خاصة حب حاجة تاني مع الأوردري يا فندم تحب
أضيف لحضرتك بطاطس مقرمشة

المتسابقة: ايه ده انت أديك اتكلمت تاني

مقدم التحدي: ما أنا لازم أتكلم ما هو الموضوع ده ما يتسكتش عليه هو انت جاية
تحقق أحلامك هنا .. أحلامي على قدك احنا أساسا عاملين التحدي ده علشان نرفه
على نفسنا مش علشان نبيع أعضاءنا علشان حضرتك تجيبي كل اللي نفسك في

المتسابقة: ممكن أقول لك حاجة

مقدم التحدي: اتفضلي

المتسابقة: كده يبقى باقي خمسين سؤال

مقدم التحدي: انت حقيقي ازاي كده

المتسابقة: ازاي ايه أنا مريحة في الكلام وبحب أتكلم مع ناس كثير فعلشان كده انت بتتسى نفسك وبتتكلّم معايا عادي وبتتسى إن احنا في تحدي أساسا

ليه؟

تحب أغني لك

ليه؟

علشان أنا صوتي حلو ولا تحب أرقص لك

ليه؟

علشان أنا بعرف أرقص كويس جدا

مقدم التحدي: طب ما توريني حاجة كده على السريع

المتسابقة: كده يبقى أربعين سؤال

مدير التنظيم: ارحمني يا رب ركز في الشغل يا أستاذ

مقدم التحدي: ليه؟

علشان أنا مليت من الكلام عن نفسي تيجي أكلمك عن صاحبتني عبير

ليه؟

علشان هي رخمة زيك انت عارف لو جبتك انت وهي وقعدتكم جنب بعض ممكن

تحصل معجزة في الكوكب

ليه؟

علشان انت ما تعرفهاش دي عدوها تكون أي واحدة فينا لابسة حاجة جديدة أو حاجة حلوة تقوم قايلة الطقم ده مش حلو عليك مغمق بشرتك وتقعّد تقول كلام زي كده كثير وهي صفراء من جوه كده

ليه؟

ما أعرفش بس ممكن علشان تربيتها كده

ليه؟

ممكن تسأل في السؤال ده باباها علشان مش أنا اللي رببتها

ليه؟

علشان تعرف إنها صفراء

ليه؟

علشان ما تصاحبهاش

ليه؟

علشان زي ما قلت لك هي صفراء

ليه؟

علشان باقي عشرة أسئلة كمان وهفوز

ليه؟

علشان أكون أول واحدة فازت في التحدي

ليه؟

تيجي نتصور

ليه؟

أضحك بس علشان الصورة تطلع حلوة

مقدم التحدي: لا شيل الفلتر ده

المتسابقة: ليه

مقدم التحدي: علشان أنت بتتصور مع راجل ما ينفعش تحط فلتر زي ده

المتسابقة: خلاص شلته ما تز عيش كده

يلا بقى أضحك

مقدم التحدي: يلا نكمل التحدي

ليه؟

علشان أنا انزلها علي الإنستقرام

ليه؟

علشان الناس تعرف إنني أول واحدة تفوز في التحدي

ليه؟

علشان أبقى قوية

ليه؟

هو إحنا باقي عندنا كم سؤال

ليه؟

علشان أعرف

ليه؟

أصل الموضوع بقى رخم

ليه؟

ابتديت أسترخمك بصراحة

ليه؟

ما أعرفش حاسة كده إني اتسرعت

ليه؟

علشان إحنا مش مناسبين لبعض

ليه؟

علشان انت مفيش فيك الصفات اللي أنا محتاجها

ليه؟

أضحك كده

ليه؟

أضحك بس شوف انت أسنانك صفراء ازاي انت عارف الإنسان اللي ما بيغسلش أسنانه ده بيكون شكله مش حلو علشان كده أوعدني إنك تغسل أسنانك

مقدم التحدي: أوعدك

المتسابقة: أديك اتكلمت ناقص بقى عشرة أسئلة كمان

مقدم التحدي: انت يا أستاذة فائزة أساسا من ساعة الصورة أنتي كنتي معدية ثلاثين سؤال فانت فزتي معانا بس بقول لك ايه هو احنا فعلا ممكن نرتبط

المتسابقة: لا طبعا انت تجننت أنا أرتبط بيبك انت احنا هنا في تحدي

وأنا أول لما عرفت إن اللي هيقدم التحدي شاب قلت خلاص أنا كده كده كسبت التحدي أدخل على الشاب ده في موضوع الحب والارتباط وانتم كشباب تصدقوا لما بنت بس تتكلم معاكم في موضوع الارتباط علشان كده أنا كسبت التحدي وأكون أول واحدة كسبت تحدي

مقدم التحدي: بس للأسف يا أستاذة في متسابق قدامك رقم اثنين المتسابق ده أونلاين
لو هو فاز في التحدي حضرتك مش هتكوني أول واحدة تفوز في التحدي تكون
الثانية

المتسابقة: بس أنا عملت ده كله علشان أكون أول واحدة تفوز مش معقول بعد ده
كله أخسر

مقدم التحدي: اتفضلي يا أستاذة مبروك انت فزتي بس موضوع إنك أول واحدة لسه
ما اتحددتش وأتمنى ما تكونيش انت أول واحدة علشان اللي بيتبني على الغش ما
بيستمرش

المتسابقة: يعني انت مش عايز تاخذ رقمي وتخليني انا أول واحدة تفوز في التحدي

مقدم التحدي: رقمك ايه يا أستاذة الرقم ده كان زمان دلوقتي في سناب شات في
انستقرام وانا للأسف ما بعرفش أستخدمهم هم الاثنين فعلى كده مش هينفع نرتبط
اتفضلي يا أستاذة

دخل المسابق رقم أربعة

المتسابقة رقم 4

مدير التنظيم: المتسابق رقم أربعة، قف هنا وعرف نفسك
المتسابق: اسمي رمضان من الشرقية

ليه؟

ايه الي ليه السلام عليكم يا عم مدير التنظيم

مدير التنظيم: خد يا رمضان... يا رمضان

انت لحقت؟!!

رمضان: يا عم أنا مش مكمل مع المجنونة اللي جوه. أنا بقول له اسمي رمضان
من الشرقية، يقول لي "ليه؟" هي ناقصة أنا مروح

مدير التنظيم: الي تشوفه يا رمضان

مقدم التحدي: ده ياخذ جائزة أسرع متسابق في التاريخ حصل على واحد "ليه" بس

مدير التنظيم: معلش، أصل الشرقية ولاد عم الصعايدة، هتلاقيهم مقفلين شوية

مقدم التحدي: طب دخل اللي بعده وانت ساكت

المتسابقة رقم 5

مدير التنظيم: المتسابق رقم خمسة ، قف هنا وعرفني نفسك

فاكر البنت اللي دخلت قبل الراجل ده اللي طالع بسرعة؟

ليه؟

دي صاحبتني

ليه؟

مش عايز تعرف عنها أي حاجة؟

ليه؟

هو انت مش بتتكلم؟ ليه؟ دي قالت لي إنك عبيط وممكن تتكلم بسهولة

ليه؟

علشان أكسب التحدي

ليه؟

علشان أنزل عشرة أسئلة

ليه؟

علشان اكمل التحدي

ليه؟

علشان أفوز زيها

ليه؟

علشان هي ما تعملش حاجة، وأنا ما أعرفش أعمل زيها

ليه؟

أنا اتوترت ممكن أشرب ميه؟

ليه؟

علشان أنا عطشانة

ليه؟

علشان الميه دي حاجة مهمة في الحياة

ليه؟

علشان نعيش ونحقق اللي احنا عايزينه

ليه؟

علشان هي كده الحياة

ليه؟

احنا دلوقتي كم سؤال؟

ليه؟

علشان أعرف فاضل كام سؤال وأفوز

ليه؟

علشان الموضوع طلع صعب! أنا عايزة أعرف هي عملتها إزاي

ليه؟

علشان أعمل زيها

ليه؟

علشان أبقى أقوى منها

ليه؟

طب هي عملت إيه علشان تخلصي الأسئلة؟

ليه؟

أسكت مش كل حاجة ليه ليه انت بتوترني بسؤالك ده؟

ليه؟

أنا خارجة ومش مكلمة التحدي

ليه؟

مدير التنظيم: وبعدين! إحنا كده مش هنلاقي حد يكمل التحدي

مقدم التحدي: طب قل لي أنا أعمل إيه؟ الناس مش مستحيلة

مدير التنظيم: طب خف على الناس شوية

مقدم التحدي: هو أنا بعمل حاجة غير بسأل سؤال واحد بكلمة واحدة وهي ليه؟

أعمل إيه أقل من كده؟

مدير التنظيم: ليه؟

مقدم التحدي: لا أنا هنا اللي بسأل ليه؟ انت ما تقوليش انت ليه؟

مدير التنظيم: ليه؟

مقدم التحدي: لا، أنا مش بستحمل زي الناس دي. إنتو أساساً مخترين الشخص

الغلط

مدير التنظيم: بقولك إيه، في واحد زيك كده بالضبط بس هو مبيستحملش أكثر منك

وعصبي شوية. إيه رأيك ندخلهولك ونخلص منه؟ هو المتسابق رقم 7، بس أنا

ممکن أدخلهولك رقم 6، وهو كده كده مش هياخد معاك وقت علشان واخذ مكان
على الفاضي وهو مش هيكمل دقيقة معاك
مقدم التحدي: تمام، دخلو

المتسابقة رقم 6

مدير التنظيم: المتسابق رقم ستة لا يا أستاذة، معلش حصل خطأ في التنظيم.
الأستاذ رقم 6 وحضرتك رقم 7. أنا آسف على الخطأ ده. اتفضلي يا أستاذ قف هنا
وعرّفي نفسك وابدأ التحدي

المتسابق: طب تمام، اتفضل انت بره وأنا هشوف الموضوع ده معاه
ليه؟

المكان حلو بس مش متأسس صح
ليه؟

إيه ده؟ إيه ده؟ هو مين المهندس عديم الخبرة الذي اشتغل هنا أكيد حديث التخرج؟
ليه؟

مهندس عديم الخبرة وعار على كلية الهندسة إنّ تخرج مهندس زي ده، أنا مش
عارف كانوا بيدرسولهم إيه
ليه؟

الهندسة اللي عمل الصاقط ده. ده في نص الأوضة بوظ المنظر خالص
ليه؟

كان المفروض يعالج إيه الموضوع؟
ليه؟

احنا لو قسنا من أول العمود، العمود اللي جنبه ما تجيش 4 متر
ليه؟

ف لزمته إيه بقى؟ الساقط اللي هو عمله؟

ليه؟

بس يلا،

شكله المالك كان بيسترخص وجاب مهندس حديث التخرج، وهو كله بيأكل عيش،
بس بيحرقوا دمننا على الفاضي

ليه؟

ده كمان السقف مش متساوي

ليه؟

يلا، ما هي ما باظتتش من شوية

ليه؟

أنا حاسس كمان منسوب الأرض مش كويس

ليه؟

نزل من عندك شوية ميه كده. عايز أشوف المنسوب رايح فين

ليه؟

علشان أعرف إذا كان المهندس اللي استلم استلم صح، والمنسوب معمول صح ولا
لا

ليه؟

علشان أعرف إنه شاطر ولا أي كلام بس من موضوع الساقط ده وهو في نظري
أي كلام، فعايز أعرف في استلام السيراميك عرف يستلم صح ولا طلع أي كلام
وشوية صنايعية ميفهموش حاجة في الهندسة ضحكوا علي

ليه؟

وأنا بقول من خبرتي إنه أي كلام بس، عايز أتأكد

ليه؟

إيه اللي ليه؟ ده أنا أربع سنين بدرس في هندسة وبديك المعلومات دي ببلاش

ليه؟

فما تقوليش ليه

ليه؟

ما تعصبنيش، أنت بتدخن؟

ليه؟

كنت هديك سيجارة

ليه؟

علشان تتدخل

ليه؟

علشان تدمر صحتك

ليه؟

علشان تموت ونخلص منك

ليه؟

علشان ترتاح وتقابل وجه كريم، وكلنا نرتاح

ليه؟

علشان دي الحاجة الوحيدة اللي ما فيهاش "ليه". دي الراحة الأبدية، وكل واحد على حسب أعماله

ليه؟

علشان لو أعمل لك صالحة، هتدخل الجنة ولو أعمالك زي المهندس ده؟ هتشرف معاه في جهنم

ليه؟

علشان أعمالكم طين زي بعض

ليه؟

أنت عارف اني أنا اتعرض عليا أشتغل في مشروع كان كفيل يطلع البلد فيه 100 سنة لقدام؟

ليه؟

ورفضوه، عارف ليه؟

ليه؟

علشان ما كانش من مستواي، و عملوا مهندس ثاني وفشل عارف ليه؟

ليه؟

علشان ما تعاونوش مع واحد خبرة زيي

ليه؟

أنت عارف لو من الأول كانوا جاءوا إلي ، أنا كنت عملت المشروع ده حاجة تانية خالص

ليه؟

علشان خبرة

ليه؟

الخبرة تفرق

ليه؟

خلي بالك علشان مش أي صنايعي بقى مقول يتقال له يا باشمهندس إحنا تعبنا أربع سنين في الكلية ما كناش بنام علشان بس يتقال لنا يا باشمهندس

ليه؟

أنا السقف ده مش مرتاح له

ليه؟

حسّه مش مضبوط

ليه؟

علشان دي خبرة. زي ما قلت لك، لو جبنا جهاز توتال ووقفناه في الزاوية، ورفعنا السقف ده هتلاقي فيه 4 سم أقل حاجة

ليه؟

علشان أنا خبرة بقول لك كده

ليه؟

ثواني معايا تليفون

ليه؟

ثواني أرد أشوف إيه

ليه؟

مش عايز أسمع صوتك ده مدير الموقع بيتصل

ليه؟

الو، هندسة، أمرني

...انت فين؟

انا اديني في البيت

...طب تعال الموقع دلوقتي

طب عايزني اجي الموقع دلوقتي؟ خير، في حاجة ولا إيه !!

...في خرسانات

خرسانات إيه دلوقتي يا هندسة؟ ده الواحد صدق لما يروح

... المعمل بعت البامب، وساعة كمان وهيبعتوا الخرسانات عايزك قبل الساعة

تكون واقف على السقف

اللي تشوفه يا هندسة، انا جاي لك

بقول لك إيه، الغي التحدي؟ عندي خرسانات ولازم أنزل إلى الموقع حالاً

يلا، أشوفك على خير

مدير التنظيم : إيه ده؟ خد وقت يعني؟ ده أنا كنت متوقع إنه يطلع أسرع من كده

مقدم التحدي: لا، ده كان هيكمل بس احتاجوه في الموقع يلا دخل المتسابق اللي

بعده

المتسابق رقم 7

مدير التنظيم: اتفضلي يا أستاذة، أوقفي هنا وعرفي نفسك وسنك، وابدأي التحدي

اسمي رانيا السيد، السن بلاش تعرف

ليه؟

ما اعرفش بس هكذب، وانا مش عايزة اكذب

ليه؟

علشان ما تعرفش حقيقه

ليه؟

علشان ما بحبش أكبر نفسي

ليه؟

علشان افضل جميلة

ليه؟

علشان السن ده مجرد رقم في البطاقة

ليه؟

علشان احنا بنعيشه

ليه؟

علشان موجودين في الحياة فلازم نعيش

ليه؟

مش عارفة بس ممكن نغير الموضوع

ليه؟

علشان اعرف أرد على أسئلتك

ليه؟

علشان أخلص من التحدي

ليه؟

ممکن افتح موضوع جديد علشان بجد انا اتخنقت من أسئلتك

ليه؟

عايز افتح موضوع جديد

ليه؟

علشان ما انهيش التحدي

ليه؟

انا مش عايزة اكمل التحدي، مش عايزة اسمع صوتك، ما تسألنيش ليه؟

مدير التنظيم: إيه، انت لحقت؟ ده أنا قلت هتكلم معاك. ده خرجت أسرع من الأستاذ اللي احنا كنا قايلين إنه مش هياخذ وقت

مقدم التحدي: مش عارف بجد إيه الدنيا شكله، التحدي صعب ولا إيه؟ احنا لحد دلوقتي ما فيش غير واحدة بس قدرت تخلص التحدي من ضمن سبعة، وكمان ما كملتش 33 سؤال

الظاهر كده ما فيش حد هيقدر يكمل التحدي، ولو أنا كنت في التحدي ما كنتش هكمل الـ100 سؤال ده استحالة، وكنت ممكن أضرب الشخص الي بيسألني

مدير التنظيم : طب كويس إنك ما نزلتش معانا في التحدي. متبقي ثلاث متسابقين

مقدم التحدي: ليه هم اللي قدموا في المسابقة 10 بس؟

مدير التنظيم : أيوه

مقدم التحدي: طب كويس، دخل المتسابق رقم 8. خلينا نخلص من التحدي ونشوف

هل هيستطيع حد ثاني يخلص التحدي أو هل هيستطيع حد يكسر رقم المهندس

مدير التنظيم: ليه؟ هو مش البننت اللي فازت هي أعلى رقم لحد دلوقتي؟

مقدم التحدي: لا، المهندس وصل 42 وكان هيخلص الموضوع لكن حصل ظرف
عنده في الشغل
مدير التنظيم: حقيقي، أنا منبهر. ده الوحيد اللي أنا قلت له مش هيكمل. يكسر رقم
قياسي.
مقدم التحدي: شوفت بقي ؟ دخل المتسابق الذي بعده

المتسابق رقم 8

مدير التنظيم : تمام افضل يا استاذ عرف نفسك وسنك وابدأ التحدي
الاسم مراد، اسم 17 سنة

ليه؟

وانت مالك

ليه؟

علشان أنا دماغي كده لك شوق في حاجة

ليه؟

شكالك تعبان، انت اسمك إيه على التيك توك

ليه؟

علشان اعمل لك متابعة

ليه؟

انت عندك تيك توك أصلاً

ليه؟

يبقى ما عندكش

ليه؟

علشان عندهم تيك توك ببيان عليهم

ليه؟

انت متابع الترنادات

ليه؟

علشان تعرف الدنيا حصل فيها إيه بس في ترند قلب الدنيا كلها اليومين دول

ليه؟

شوف انت بس كده وقول لي إيه رأيك

ليه؟

مش حلو، أنا قلت كده. الترنند ده آخره يومين ويخنفني، مش هيعيش معانا شوية

ليه؟

علشان مش حلو هو آه قلب الدنيا لكن ما فيهوش فكرة. انت عارف الترنند ده لو فيه فكرة وسهلة ناس تعمله كنت أقدر أقول لك إنه هيعيش معانا شوية

ليه؟

علشان أنا جعان، أطلب لك أكل

ليه؟

ما أنا قلت لك علشان جعان

ليه؟

علشان أكل

ليه؟

عشان أعرف أتعامل معاك

ليه؟

علشان أكسب التحدي

ليه؟

علشان أكون مميز

ليه؟

علشان أشرب عصير

ليه؟

علشان أتجوز

ليه؟

علشان أخلف

ليه؟

علشان ابني يشرب عصير

ليه؟

عشان يتجوز

ليه؟

علشان ابن ابني يشرب عصير

ليه؟

علشان أنا أموت

ليه؟

علشان دي النهاية

ليه؟

علشان أنا خلصت كل حاجة وشربت العصير

ليه؟

نغير الموضوع، يلا نغير الموضوع. بتشجع كورة

ليه؟

علشان أعرف انت بتشجع مين

ليه؟

علشان أعرف لو إحنا بنشجع نفس الفريق

ليه؟

طب نغير الموضوع، نفتح موضوع جديد. أنت ساكن، يمكن نكون جيران

ليه؟

علشان لو جيران، تبقى تاخذني في سكتك وانت مروح

ليه؟

علشان ما عنديش عربية

ليه؟

علشان ما عنديش فلوس، ما بعرفش أسوق

ليه؟

علشان مش شغال وما بحبش السواقة

ليه؟

مش عارف، افتح مواضيع جديدة. افتح انت موضوع نتكلم فيه، علشان أنا كده الكلام عندك خلص

ليه؟

يبقى على الآخر كده ما فيش عندي كلام تاني أقدر أقوله. أنا كده والحمد لله خلصت

مدير التنظيم : يعني حابب تنسحب؟

مراد: ما عنديش حاجة تانية أتكلم فيها

مقدم التحدي: طب تمام، اتفضل. أنت وصلت لـ 37 سؤال أي نعم أنت خسرت،

بس أنت ثاني شخص في الرقم القياسي حتى الآن مبروك وكان نفسنا تكسب بس اهو نصيبك كده

مراد: يلا اهو نصيب. بس أنا مبسوطة إنني تعرفت عليكم، يلا، فرصة حلوة، باي

باي

مقدم التحدي: المتسابق التالي

المتسابق رقم 9

مدير التنظيم: اقلي هنا، عرفى اسمك وسنك وابدئي التحدي
نوران، 16 سنة، طالبة

ليه؟

علشان أنا لسه بدرس

ليه؟

علشان أنجح

ليه؟

علشان أخرج

ليه؟

علشان أشتغل

ليه؟

علشان يكون عندي فلوس

ليه؟

علشان أشتري اللي أنا عايزاه

ليه؟

علشان ما احتاجش لحد

ليه؟

علشان، علشان، علشان، مش عارفة

ليه؟

مش عارفة حقيقي

ليه؟

أنا خارجة

ليه؟

علشان مش عارفة أجاب

ليه؟

علشان لازم أجاب

ليه؟

علشان تبطل تسأل

ليه؟

علشان أفوز في التحدي

ليه؟

علشان، علشان، علشان، أنا آسفة، سلام سلام

ليه؟

مدير التنظيم : أيه نظام الاطفال ده؟ دي البنات طالعة تجري. هي كملت حاجة؟ مش

فاضل غير متسابق واحد، هنعلم إيه في التحدي؟

مقدم التحدي : إن شاء الله خير. دخل المتسابق الأخير

المتسابق رقم 10

مدير التنظيم: انفضل، اقف هنا، عرف نفسك وسنك وابدأ التحدي

أمير، 18 سنة، على الله

ليه؟

ليه أنت ليه بتسأل

ليه؟

ليه علشان ده سؤال ما لو ش لازمة

ليه؟

ليه رأيك نلعب لعبة

ليه؟

علشان نكسب وقت

ليه؟

أحسن من الملل إيه اللي أنت فيه ده

ليه؟

تعرف تلعب ضمنه

ليه؟

أهو حاجة تسلينا

ليه؟

بتشجع إيه في الدوري الإنجليزي

ليه؟

لا ده نادي هايل بس في الفترة الأخيرة ما بيعملش نتائج حلوة

ليه؟

علشان ما عندوش لعبة كويسة

ليه؟

علشان لو اشترى لعبية كان نافس على الدوري السنة دي

ليه؟

علشان القرد في عين أم غزال

ليه؟

العب باليه

ليه؟

شيبسي وكراتيه

ليه؟

قلبط يا حبيبي بجنيه

ليه؟

اشترى انتريه

ليه؟

سمك فياليه

ليه؟

من غير ليه

ليه؟

تعرف تتكلم

ليه؟

علشان أسمع صوتك

ليه؟

صحيح، أنا حاسس إن الموضوع بدأ يكون صعب. إيه نعم. إحنا ماشيين حلوين لكن الموضوع بدأ يضيق معايا

ليه؟

مش عارف، حاسس إن إحنا بنكرر نفس الإجابات بس أنا لازم أكسب التحدي مش هسيبك

ليه؟

تسمع مهرجانات

ليه؟

بتسمع لمين

ليه؟

ده مهرجان

ليه؟

ولا أغنية

ليه؟

ممكن ما أكملش وأوع تسألني ليه؟

مقدم التحدي: اللي تشوفه وعلى فكرة أنا اتكلمت يعني انت لو حابب تكمل هتنقص
10 أسئلة

امير: لا لا حقيقي، أنا مش هقدر أكمل. الموضوع صعب وأنا كل ما أفتح موضوع
انت بتقفله، أنا مش هكمل

مدير التنظيم: اللي تشوفه هو أمير خرج على كام؟

مقدم التحدي: 27

مدير التنظيم: على فكرة رقمك حلو مش وحش. وانت لو حابب تكمل، كنت تقدر
تكمل وممكن كنت تقدر تخلص التحدي

أمير: يلا معلش، أستأذن أنا

مقدم التحدي: اتفضل يا أمير

مدير التنظيم : إحنا كده ما فيش غير اثنين. واحدة خلصت التحدي وواحد حقق أكبر رقم. ومعانا المتسابق الأونلاين رقم 2. هنشوف هل هيكون بطل التحدي ويقدر يعدي التحدي ويقدر يخلص التحدي، ولا ممكن ما يقدرش يخلص التحدي بس يقدر يعمل رقم قياسي؟

إحنا أعلى رقم وصلنا له لحد دلوقتي المهندس ، حقق 42. فأنت دلوقتي فرصتك. تنهي التحدي وتكون بطل التحدي، أم تكسر رقم جديد في التحدي وتكون أكثر الأشخاص حتى الآن استطاعوا أن يجيبوا على أسئلة في تحدي ليه؟

الرجاء الرجوع إلى المسابقة الخاصة بك وإكمال التحدي. وإذا استطعت أن تنهي التحدي أو أن تكسر ذلك الرقم ترسله لنا كما موضح لك في قائمة المسابقة، سوف تكون معنا في الجزء الثاني من المسابقة.

وسوف يكون ذلك الجزء للأبطال فقط. فلا تنسى أن تعرف نفسك جيدًا قبل أن تبدأ التحدي

ويمكنك أيضًا قراءة الأعمال الأدبية السابقة للكاتب يوسف النصر حتى يأتي الجزء الثاني من تحدي ليه للأبطال فقط.

وأعمال الكاتب يوسف النصر هي كالتالي

رواية المهودور

رواية نظرية الفرطة

رواية بنت الجانف

رواية حرام في حرام

رواية نعم أنا غبي
رواية حرب 3 م
رواية 8 ساعات حب
رواية ينوم
رواية رهيفة هانم إدريس
رواية أنا رجل يا حنان

كل ذلك الروايات متاحة للتحميل المجاني من على جوجل على أكثر من 12 منصة حتى الآن. كل ما عليك كتابة اسم الرواية التي تريد أن تقرأها في خانة البحث وسوف يظهر لك كافة المنصات التي تستطيع أن تحمل منها الرواية مجاناً نتمنى لكم قراءة ممتعة. وانتظرونا في الجزء الثاني من التحدي ليه للأبطال فقط من بطولتك أنت.

فإلى اللقاء في تحدي ليه للأبطال فقط قريباً

جميع الحقوق محفوظة © 2025 يوسف النصر. لا يجوز إعادة نشر أو توزيع أي جزء من هذا العمل دون إذن كتابي مسبق من الكاتب يوسف النصر.